

北周道安法師

遺誠九章

遺誠九章

北周道安法師

敬謝諸弟子等。夫出家為道至重、至難，不可自輕、不可自易。所謂重者：荷道佩德，縈仁負義，奉持淨戒，死而有已。所謂難者：絕世離俗，永割親愛，迴情易性，不同於眾；行人所不能行，割人所不能割，忍苦受辱，捐棄軀命，謂之難者，名曰道人。

道人者：導人也。行必可履，言必可法；被服出家，動為法則；不貪、不諍、不讒、不匿；學問高遠，志在玄默，是為名稱參位三尊。出賢入聖，滌除精魂，故得君主不望其報，父母不望其力，普天之人莫不歸攝，捐妻減養供奉衣食，屈身俯仰不辭勞役者，以其志行清潔通於神明，淡泊虛白可奇、可貴！

自頃荒流，道法遂替，新學之人未體法則，著邪棄正，忘其真實，以小黠為智，以小供為足，飽食終日無所用心，退自推觀，良亦可悲！計今出家或有年歲，經業未通，文字不決，徒喪一世無所成名，如此之事可不深思？無常之限非旦即夕，三塗苦痛無強無弱，師徒義深故以申示，有情之流可為永誠。

其一曰：

卿已出家，永違所生，剃髮毀容，法服加行，辭親之日，上下涕零！

割愛崇道，意陵太清，當遵此志，經道修明。如何無心，故在色聲？悠悠竟日，經業不成。德行日損，穢跡遂盈，師友慚恥，凡俗所輕。如是出家，徒自辱名，今故誨勵，宜當專精！

其二曰：

卿已出家，棄俗辭君，應自誨勵：志果青雲，財色不顧，與世不群。金玉不貴，惟道為珍。約己守節，甘苦樂貧。進德自度，又能度人。如何改操，趨走風塵？坐不暖席，馳物東西。劇如徭役，縣官所牽。經道不通，戒德不全。朋友蚩弄，同學棄捐。如是出家，徒喪天年。今故誨勵，宜各自憐。

其三曰：

卿已出家，永辭宗族。無親、無疎，清淨無欲；吉則不歡，凶則不感。超然縱容，豁然離俗，志在玄妙，軌真守樸。得度廣濟，普蒙福祿。如何無心，仍著染觸？空爭長短，銖兩升斛。與世同利，何異僮僕？經道不明，德行不足。如是出家，徒自毀辱。今故誨示，宜自洗沐！

其四曰：

卿已出家，號曰道人。父母不敬，世帝不臣，普天同奉事之如神，稽首致敬不計富貧，尚其清修自利利人。減割之重，一米七斤，如何怠慢，不能報恩？倚縱遊逸，身意虛煩。無戒食施，死入太山。燒鐵為食，融銅灌咽，如斯之痛，法句所陳。今故誨約，宜改自新。

其五曰：

卿已出家，號曰息心。穢雜不著，惟道是欽。志參清潔，如玉如冰。當修經戒。以濟精神。眾生蒙祐，并度所親。如何無心，隨俗浮沈？縱其四大，恣其五根，道德遂淺，世事更深，如是出家與世同塵。今故戒約幸自開神。

其六曰：

卿已出家，捐世形軀，當務竭情，泥洹合符。如何擾動，不樂閑居？經道損耗，世事有餘，清白不覆，反入泥塗。過影之命，或在須臾，地獄之痛，難可具書。今故戒勵宜崇典謨。

其七曰：

卿已出家，不可自寬。形雖鄙陋，使行可觀。衣服雖麤，坐起令端。飲食雖疏，出言可餐。夏則忍飢，冬則忍寒。能自守節，不飲盜泉。不肖之供，足不妄前。久處私室，如臨至尊。學雖不多，可齊上賢。

如是出家足報二親，宗族知識一切蒙恩。今故戒汝各宜自敦。

其八曰：

卿已出家，性有昏明，學無多少，要在修精。上士坐禪，中士誦經，下士堪能塔寺經營，豈可終日一無所成？立身無聞，可謂徒生。今故誨汝宜自端情。

其九曰：

卿已出家，永違二親，道法革性，俗服離身。辭親之日，乍悲乍欣，邈爾絕俗，超出埃塵，當修經道，制己履真。如何無心，更染俗因？經道已薄，行無毛分，言非可貴，德非可珍，師友致累，恚恨日殷。

如是出家損法辱身，思之、念之，好自將身！